


**КОНСТИТУЦИЯЛЫҚ
СОТ ӘДІЛЕТТІ
ҚАЗАҚСТАННЫҢ
АЙНАСЫ БОЛА АЛА
МА?**

2-бет



**АЖЫРАСУ –
ҚОҒАМНЫҢ
ДЕРТІ**

6-бет



**БЕС
ҚОНАҚ**

8-бет

ЗАҢ газеті

✉ zangazet@mail.ru

№1 (3532) 6 қаңтар 2023



ZANMEDIA.KZ

Қоғамдық-саяси, құқықтық газет

БҮГІНГІНІҢ БАС ТАҚЫРЫБЫ

2023: ЖАҒЫМДЫ ЖАҢАЛЫҚ ТАРМЕН БАСТАЛДЫ



2023 жылдың алғашқы күнпарақтары маңызды тағайындаулармен басталды. Мемлекет басшысының бұйрығымен бірқатар министрлердің қатары қайта жасақталды. Президент Индустрия және инфрақұрылымдық даму министрі етіп Марат Қарабаевты, Экология және табиғи ресурстар министріне Зүлфия Сүлейменованы, Мәдениет және спорт министрі қызметіне Асхат Ораловты, Оқу-ағарту министріне Ғани Бейсембаевты және Әділет министрі қызметіне Азамат Есқараевты тағайындады.

(Соңы 3-бетте)

ОРАЙЫ КЕЛГЕН ӨҢГІМЕ

Нүриден **ДАУЫЛБАЕВ**,
ҚР ІІМ басқарма бастығы:

«ІШКІ ІСТЕР САЛАСЫНА РЕФОРМА КЕРЕК»

– Нүриден Әбілханұлы, қанды қаңтар оқиғасының өткеніне бір жыл болды. Бейбіт митингіні бүлікшілер өз мақсатына пайдаланып, салдарынан адамдар құрбан болып, материалдық шығындар да аз болмады. Осы бір жағдайды қалай сипаттар едіңіз?

– Естеріңізге сала кетейін, бастапқыда еліміздің бірқатар өңірлерінде бірнеше күн бойы шерулер өтті. Жергілікті атқарушы және құқық қорғау органдары түсіндіру жұмыстарын жүргізді. Көтерілген мәселерді шешу бойынша нақты шаралар ұсынылды.

Алайда, кейіннен 4 және 5 қаңтарда елдің көптеген аймақтарында наразылық білдірушілер тобы бір уақытта көтеріліп, билік пен басқару органдарының, құқық қорғау органдарының және күш құрылымдарының әкімшілік ғимараттарын басып алуға кірісті. Содырлар ғимараттар мен қызметтік автокөліктерді өртеп, мүліктерді ұрлап, азаматтарды, әскери қызметшілерді және полицияларды ұрып-соқты. Айта кету керек, полиция мен әскери қызметшілерде атыс қаруы болған жоқ. Олар тек қалқандармен және дулығалармен жабдықталды.

Сонымен қатар, көптеген топтар, соның ішінде ұйымдастырушылар мен террористер өздеріне күштік құрылымдардың күштері бөлінуі үшін коммуналдық техникаға шабуыл жасай бастады. Тәртіп сақшылары басқарған көліктерді зақымдап, қызметкерлерді ұрып-соғып, оқ атқан. Жараланғандарға жедел жәрдем көлігін жібермеді.

Бұл ретте қылмыскерлер қосымша көмек тартылмас үшін полиция учаскелеріне, қару-жарақ дүкендеріне шабуыл жасап, Алматыдағы әуежайды басып алды. Сонымен қатар, адамдар қала көшелерінде оқ жаудырды, сауда, ойын-сауық орталықтары мен қаржы мекемелерін төңкеріп, банкоматтарды бұзды. Олар тікелей эфирге шығу үшін стратегиялық нысандарға – телеарналар ғимаратына, Көктөбедегі телемұнараға шабуыл жасады. Бұл азаматтардың арасында қорқыныш тудыру үшін жасалды.

(Соңы 3-бетте)

ЖАҢҒЫРЫҚ

ҚАҢТАР ОҚИҒАСЫ – ҚОҒАМДЫ ҰЙҚЫСЫНАН ОЯТТЫ

Тарихқа көз жүгіртер болсақ 1986 жылғы Желтоқсан оқиғасы Қазақ халқының тәуелсіздік жолындағы ұлт-азаттық көтерілісінің шырқау шегі болғанын аңғарамыз. Сондықтан араға 35 жыл салып, тәуелсіздіктің 30 жылдығынан кейін орын алған 2021 жылғы Қаңтар оқиғасына баға беру үшін 1 жыл жеткіліксіз екенін түсінуге көп ақылдың керегі жоқ. Сарапшылардың сөзіне қарағанда, жүздеген адамның өлімімен аяқталған бұл оқиғаны газ бағасының негізсіз көтерілуіне орай билікке өз наразылығын білдіру үшін алаңға жиналған жаңаөзендіктердің митингісімен ғана байланыстыруға болмайды. Оның себеп-салдарын биліктің барлық тармағын шырмауықтай шырмал тастаған елдегі жемқорлық пен сыбайластықтан іздеу қажет.

Жалпы, кез келген оқиғаны сараптау үшін оған құқықтық, тарихи және саяси баға берілуі керек. Ол бір күнде, бір айда не бір жылда шешіле қоятын оңай шаруа емес. Оның әділ бағасын беру үшін кейде ондаған жылдар да

аздық етеді. Тарихта оған мысалдар жеткілікті. Басқасын былай қойғанда, 1986 жылғы Желтоқсан оқиғасы соның бір дәлелі бола алады. Өйткені, оған берілген құқықтық, тарихи және саяси баға әлі күнге дейін жұртшылықты

толық қанағаттандырып отырған жоқ. Бұл әсіресе, Тәуелсіздік мерекесін тойлауда айқын аңғарылып жүр. Тарих ғылымдарының докторы, профессор, Халықаралық ақпараттандыру академиясының академигі Саттар Мәжитовтың айтуынша, бұл қалыпты нәрсе. Анау неге үйіпеді, мынау неге бүйіпеді деп оған бұлқан-талқан болып күйіп-пісудің қажеті жоқ. Уақыт бәрін өз орнына қояды. Тек бұл үшін қанша жыл керек екенін ешкім дөп басып айта алмайды. Академик Манаш Қозыбаевтың ҚР Президенті архивіне барып келген соң Ш.Уәлиханов атындағы тарих және этнология институтының ғылыми кеңесінде: «Желтоқсан оқиғасына байланысты құжаттардың біразын көрдім. Бұл оқиға туралы шындықты айту үшін кемінде 50 жыл уақыт керек-ау» дегенін еске

түсірген ғалым Қаңтар оқиғасының да әділ бағасын беру үшін бір емес, кемінде ондаған жыл қажет дегенді айтты.

Оны Қаңтар оқиғасына байланысты арнайы құрылған «Аманат» комиссиясының төрағасы Абзал Құспан да мақұлдап отыр. 2022 жылдың ең үздік адвокатының сөзіне қарағанда: «Қазіргі кезеңде бағалаудың үш түрі бар. Ең алдымен құқықтық баға беріледі. Қазір сол кезеңдеміз. Одан кейін саяси және тарихи бағалары беріледі. Тарихи бағаны халық өзі береді».

Бұл туралы 23 желтоқсанда Қаңтар оқиғасының құрбандарына арналған Алматыдағы «Тағзым» мемориалының ашылу рәсімінде ҚР Президенті Қасым-Жомарт Тоқай: «Сол күндері халқымызға зор қауіп төнді. Мемлекеттігіміздің тұғыры шайқала жаздады. Тіпті, «ел болып қаламыз ба, жоқ па» деген сұрақ туды. Бірақ біз мызғымас бірлігіміздің арқасында қатердің бетін қайтардық. Елдігімізді таныттық, мықты мемлекет екенімізді көрсеттік. Ел ішіне іріткі салғысы келген топтарға тосқауыл қойып, жымсықы әрекеттің жолын кестік. Бірқатар қалада өткен бейбіт шерулер жаппай тәртіпсіздікке ұласты. Әсіресе, тәуелсіздігіміздің алтын бесігі – Алматы қаласы қатты зардап шекті.

(Соңы 3-бетте)

